



**KENYATAAN / SIARAN AKHBAR**  
Untuk maklumat lanjut sila hubungi:  
**Bahagian Komunikasi Korporat**  
**Perbadanan Putrajaya**  
**Tel: 03-88877033 Faks: 03-88811008**



## **2,500 PESERTA SERTAI PERTANDINGAN MEMANCING PUTRAJAYA 2020**

**PUTRAJAYA, 15 Februari 2020** – Dianggarkan seramai 2,500 peserta menyertai Pertandingan Memancing Putrajaya 2020 bertempat di sisiran Tasik Presint 2,3 dan 4 Putrajaya.

Acara pelepasan dan penyampaian hadiah disempurnakan oleh Menteri Wilayah Persekutuan, YB Tuan Haji Khalid bin Abd. Samad. Turut hadir Ketua Setiausaha Kementerian Wilayah Persekutuan (KWP), YBhg. Datuk Hajah Rosida binti Jaafar dan Presiden Perbadanan Putrajaya (PPj), YBhg Datuk Dr. Aminuddin Bin Hassim.

Pertandingan Memancing Putrajaya 2020 yang diadakan bersempena dengan Sambutan Hari Wilayah Persekutuan yang ke-16 ini merupakan aktiviti yang sangat popular dikalangan kaki pancing di negara ini. Program ini merupakan edisi yang ke-19 sejak penganjurannya pada tahun 2001.

Pertandingan bermula pada jam 7.30 pagi dan berakhir pada 12.00 tengahari bertempat di sisiran tasik Presint 2, 3 dan 4. Pada pertandingan pada kali ini, PPj menyediakan hadiah lebih daripada RM20,000 dari tempat pertama hingga tempat ke-100.

Bakal juara akan menerima hadiah wang tunai sebanyak RM7,000, Naib Juara sebanyak RM5,000 dan tempat ketiga sebanyak RM3,000. Pemenang tempat ke 4 hingga 10 akan membawa pulang hadiah wang tunai RM200, pemenang tempat ke 11 hingga 20 akan menerima RM100, pemenang tempat ke 21 hingga 50 pula akan menerima RM50.00 dan pemenang tempat ke 51 hingga 100 pula akan menerima RM30.00.

PPj juga turut menyediakan 40 cabutan bertuah berupa peralatan atau perkakas memancing serta 4 hadiah bonanza berupa 1 unit TV LED 60 inci dan 3 unit TV LED 40 inci buat peserta – peserta yang bertuah. Selain itu, 1,000 helai t-shirt percuma turut disediakan kepada peserta yang telah membuat bayaran penyertaan awal.

PPj masih mengekalkan konsep “Tangkap dan Lepas Mesra Alam” yang menghendaki para peserta melepaskan semula beberapa spesis ikan terpilih. Ikan-ikan tersebut perlu dilepaskan semula ke tasik bagi menjaga proses perkembangan ikan tersebut serta memelihara sistem ekologi Tasik Putrajaya. Antara spesis ikan yang terdapat di dalam Tasik Putrajaya adalah terdiri daripada spesis yang bermutu

tinggi seperti kelah, temoleh, tengas, bujuk, kerai, sebarau, jelawat, belida, patin, tenggalan dan lain-lain.

Di samping itu, bagi memeriahkan lagi acara, turut diadakan Pertandingan Memasak Ikan Air Tawar, Pertandingan Mewarna untuk kanak-kanak bagi kategori 7 - 9 tahun dan 10 -12 tahun dan Memancing Udang untuk kanak-kanak bawah 12 tahun.

Pertandingan Memancing Putrajaya 2020 terbuka kepada semua pemancing dengan dan yuran penyertaan sebanyak RM20 bagi setiap joran bagi warganegara dan RM50.00 untuk bukan warganegara. Pemancing turut diberikan kebebasan untuk membuat pilihan bilangan joran serta lokasi untuk memancing.

Program ini memberikan peluang kepada golongan pemancing untuk sama-sama menikmati hasil pembangunan Tasik Putrajaya dengan seisi keluarga mereka. Secara tidak langsung, aktiviti ini juga memberikan nilai tambah bagi memperkasakan perkhidmatan ekosistem Tasik dan Wetland Putrajaya, sebuah tapak ekosistem perbandaran yang telah mendapat pengiktirafan sebagai Tapak Demonstrasi Ekohidrologi UNESCO-IHP sejak tahun 2010.

Sebarang maklumat lanjut berhubung Pertandingan Memancing Putrajaya 2020, sila hubungi Pegawai Media, En. Mohd Fairus Bin Mohd Padzil di talian 03-8887 7347/019-3354346 atau En Ahmad Fazila Othman di talian 03-88877325/012-5761490.

**(TENGGU AINA BINTI YTM TENGGU ISMAIL SHAH)**

Pengarah Komunikasi Korporat

b.p. Presiden

Perbadanan Putrajaya

Tarikh: Februari 2019